



07222

棟亭藏本

施愚山先生文集

二十八卷

士大夫之能詩古文者數百年以來於今爲盛予最愛
吳門汪戶部宣城施愚山先生之文其宅卓犖奇偉指
不勝屈今天下文患才多二家獨剷除一切浮腐之言
而左規右矩與古人不失尺寸此其所以難能也歲已
未施先生自京師以書來郵其詩及傳記諸作屬予論
定而序之予於先生舊爲部民未嘗一請見今定先生
文盡吾意所欲道若吾於易堂諸子儕輩相晨夕者之
所爲蓋先生學聖賢之道日久心虛平而氣下方孜孜
欲寡其過使人輕千里而告以善况區區文章之間乎
予病廢三十餘年不敢懷一刺一啓事於貴人獨往好
戶部文欲有所商確先之以書而世不察也以爲相嘗
愚山先生集序

一

議然頗尋繹是書縱橫凌厲有求勝於人之氣自恨生
不學道不能自克其名勝之私以五十無聞之年蹈少
年喜事之習今將破焚其版然而悔已不可追矣先生
詩文原本道義無自矜厲之氣其譽人也無過情之詞
綢繆往復亦未嘗自過其情所稱有道者之言非邪子
內媿而白汗交下者蓋往往而然然先生文意朴氣靜
初讀之若未嘗有所驚動於人細尋繹之則意味深長
詳復而不厭文章瑰偉之士退然不敢踐其藩籬間爲
議論若不得已而出而終不欲馳騁張皇自傷其體法
蓋才多之文先生非不能爲而不爲之而未嘗不可以
想見其才此則愚山氏之文而非它人之爲文者也先

生詩古節雅音得風人之性情海內士久服習而論定
之無待予不知言者之揚厲已予既甲乙先生文以歸
因道所私見質先生若夫弁諸集首則何敢寧都易堂
魏禧撰



愚山先生集序

施愚山先生學餘文集目錄

宣城施閏章著

男彥淳

彥恪全錄緝

孫琮

栗校字

琛

碧全校

卷之一

賦十首

卷之二

愚山先生文集目錄

志譜序十三首

卷之三

書集序十八首

卷之四

詩文序十六首

卷之五

詩文序十九首

卷之六

詩文序十九首

卷之七

詩文序十八首

卷之八

贈送序十二首

卷之九

壽序十三首

卷之十

壽序十一首

卷之十一

記十六首

卷之十二

記十七首

卷之十三

愚山先生文集

目錄

記二十二首

卷之十四

遊記十六首

卷之十五

遊記十一首

卷之十六

傳十四首

卷之十七

傳十三首
行狀一首

卷之十八

碑文十一首

卷之十九

墓志銘十一首

卷之二十

墓志銘十二首

卷之二十一

墓志銘十五首

卷之二十二

墓表六首 墓志一首 墓碣一首

卷之二十三

祭文二十一首

卷之二十四

愚山先生文集

目錄

三

祭文十三首 哀辭一首 誄一首

卷之二十五

雜著二十七首

卷之二十六

雜著二十五首

卷之二十七

書二十七首

卷之二十八

書二十九首

校閱姓氏

曾經商訂及現在校閱諸先生謹刻如左餘不敢多及

崑山

徐乾學

健菴

新城

王士禛

阮亭

秀水

朱彝尊

竹垞

吳縣

潘耒

稼堂

華亭

王頊齡

珣湖

長洲

汪琬

茗文

桐城

張英

敦復

長洲

尤侗

展成

吳江

徐釴

電發

睢州

湯斌

潛菴

愚山先生全集

校閱姓氏

宜興

陳維崧

其年

德清

徐倬

方虎

溧陽

史夔

耕巖

任丘

龐塏

雪畦

商丘

宋犖

牧仲

常熟

蔣伊

謂公

錢塘

高興

翼亭

桐城

姚文燮

經三

潯陽

張榕端

樸園

語水

吳之振

孟舉

長白

曹寅

子清

儀封張伯行 孝先

仁和湯右曾 西岷

吉水李振裕 雜饒

開封王式毅

寧陵高于澹

固始宋生子春

長洲張大受 日容

新安汪士鋐 扶晨

宜興儲欣 同人

毘陵邵長衡 子湘

泰州俞梅 太羹

愚山先生全集

校閱姓氏

南陵劉楷 蓮菴

黃岡杜濟 于皇

貴池曹曰瑛 渭符

江都卓爾堪 子任

宜興儲在文 理質

江都唐繼祖 序皇

歙縣張潮 山來

同邑高詠 阮懷

同邑孫卓 予立

同邑茆薦馨 楚晚

同邑梅庚 耦長

施愚山先生學餘文集卷之一

賦

璿璣玉衡賦

有序

蓋聞載物敷仁德莫厚於配地膺圖永祚功莫崇於敬天故上古聖皇首出風推竄聰之哲鴻濛初剖早竭仰觀之思蓋神明與造物同符而耳目與化工合撰然於穆之體以象而克彰欽若之心因器而悉察自羲軒在御分晝夜以清寧及姚唐授時定支干以甲子有虞制作久備璣衡肇詳上以齊七政之運行爛星雲於睂睫下以資庶彙之蕃息叙人物於雍熙自非聖人

愚山先生文集

卷一 賦

一

其孰知之我

皇上出震乘乾登三邁五郊祀而盟薦必親齊居而旦明罔懈恩肥土域道格蒼穹猶復廣徵俊良稍備采擇以璿璣玉衡命賦伏見敬天勤民至意臣上慚宸眷內服管窺敢稽首頓首而

賦之其詞曰

維帝載之默運泯聲臭以難名既高下以定位紛散殊以流形嬗神功以闔闢妙旋轉於不停固清寧之合撰乃天施而地生伊積氣之上浮竄羣陽之至精風雨露雷司其教舒歛溫肅推其序蘊之則寔美利於不言見之則粲星辰以衆著或隨躔度以迅行或守次舍而若



住或象九野而區分或拱辰樞而環聚亘終古其如斯
夫誰得而知其故爾乃二曜周天五行列次象緯由之
錯綜祥禳由以徵異章亥不能施其步算保章無所容
其巧智苟測景於自然良坐照其位置爰有天挺至聖
志氣如神仰觀極目理矚無垠三辰七曜旣羅於胸臆
遲速順逆洞燭其紛綸乃殫精畢慮制器以當懸象綴
珠刻玉造儀以繪紫氛璣爲圓景而穹窿於焉曲肖衡
爲橫管而日星於以爛陳由是命官則義仲和仲分其
任測晷則朝夕賓餞敬其時由璣以列其全則雖圓如
欽蓋而圖之不出指掌由衡以測其詳則雖繁於散珠
而窺之炯若察厝斗杓東而勾芒御春識農事之攸始

愚山先生文集

卷一 賦

二

微垣耀而文武協翼知皇極之咸歸其後言天之家有
三而宣夜無傳不足以窮蘊奧周髀之說雖晰而渾天
儀立遂莫出其範圍要以七政旣齊而庶績皆底非徒
求之天象也王者父天母地兄日姊月呼吸可以上通
精神捷於乎格雨暘時若稽於洪範之書卿雲載歌颺
自虞姚之冊日食修德月食修刑聖王每用以省衮職
風不鳴條雨不破塊古帝本之以承天則它若泰階平
則上理丕奏奎井聚則賢才彙征天倉顯而歲豐黍稷
攬槍晦而世偃甲兵皆有感而胥應信宸徵之分明故
三言近仁癸惑退舍而恐後以民爲天管氏昌言於齊
后董子對天人以陳王道春秋書災異以警休咎旣協

極於維皇固知純嘏之輻輳

粵江賦

壬辰暮春奉使西粵將下灘水汎蒼梧時嶺南甫定所在榛莽心懸萬里勢異三江行而不息遂浮漲海爰抒情託翰以粵江命篇事不期詳聊書卽目辭不競侈略紀荒隅若曰揚玄虛之清波鼓景純之洪沫此則平子爲之絕倒士龍需以覆瓿云爾

頓余轡兮桂嶺鼓余柅兮灘江維此流之湍沛實分源於沅湘鑿靈渠而曲注滙猗洞以沆瀣豈天地之鍾崇抑河伯之流殃南連交趾北控漢陽西毗巫峽東浴扶

愚山先生文集

卷一

賦

三

桑神禹望淵而卻步桑欽輟翰而徬徨險隘劣於容舫森激騰於飛矢壘羊腸以爲崖紛犬牙之錯峙橫磯截而若斷積峽閉而還啟瞻前後其不屬洵眩目而駭耳於時青陽弭節朱明發塗瘴雲釀厲炎風煽愁入舟若甕披絺勝裘雖漣漪而樂飢曾不可以久留聊翹首以遐矚託乘槎以寫憂若夫夾岸層崑詭形不若或上方而下圓或踵銳而頂縮此乍騰而旋倚彼奮飛而中落爲杵臼之參差爲刀劍之峯嶺渺烟雲之旖旎森虎豹之相搏雲竇宵其洪深洞門閭其寥廓竄魑魅之窟宇江妃之所磅礴若夫石壁百仞的爍玲瓏蟲鳥繪繡風雨磨礧陵潔則玉屏失素渥丹則晨霞奪紅盼盼若鬚

簪之刻畫纍纍懸鐘鼓
肅雍俯墜而成飲猿仰躍而
作飛熊日曜珊瑚之圃潭澄珠貝之宮湛縹青與結綠
與雲水相菁葱良綺麗而難忘亦愀愴而動容爾乃急
湍危灘星羅電逐倍蒺藜之糾蔓驅地軸以反覆龍首
乍昂鰲背潛伏雷劈聲訇黃牛吼瀑雷劈黃牛並灘名貫舳艫
於一綫汙盤渦於千曲石碾碾而相脛水噉噉而自哭
蝮蛇噴氣以成霧鱗魚張口以伺肉苟失路於秋毫將
永逝而不復其艸木則鬱金馥烈冶葛蔓延菓鏤人面
樹號鈞緣地羅錦燦斷續藤牽楓人椰子筴竹木棉桂
緣岡以挺翠榕抱石以連蜷問枕椰於密谷舉茱萸於
崇山艸吉利以祛毒竹輪困而爲船上林絕種本草遺

愚山先生文集

卷一

賦

四

編其鳥獸則豺狼壘跡兕狄交衢林潛犀象原臥麇麕
猩猩躑躅鷩鷩笑呼糖牛舐舌飛虎餐膚錦雞孔雀倒
掛提壺憐彩翰之鷄鷄憎南飛之鷓鴣彼吉了與鸚鵡
豈言語之與人殊何託體於嶺表寄翩翹之微軀羨羽
族之有口哀人生之鬱紆爾其乘迅流之逸駭命蘭楫
之駘蕩語未終而岸移瞬方迎而境往駕飛廉而奔駢
驟虬螭而懼悅至於緣磯升舫濡裳引纜瀨急篙摧裝
傾水濺舟人屈屨而叫號若哀鴻之悲彈方杲杲而日
出鬱炎炎以沸湯竈負沙以出曝鮫跳波而驚翔忽淫
淫而滂沛雲慘慘以晝昏木樓樓兮肌粟水從從兮山
奔迷帆檣其失影悵天地之何存歎陰霽之回互愆四

序之寒暄訪溪蠻兮鳥夷問江亭兮水驛敗瓦頽碑梯
崩徑圻或卉服而鳥言亦巢山而栖石渺乎若行蟻之
上枯梨梢兮若蝸牛之廬絕壁於是有漢將南征戈船
竹舸馮夷出鬪鮫人並坐馬飲流而駭毒士解甲而就
裸馳羽檄而逡巡仰跼鳶之前墮亦有宦游使者持節
浮槎感夢山靈隕泪江花悼然犀之短照耿幽咽於哀
筇霓旌折於窮島鷁首沈於漲沙若乃魚鹽市販之徒
珍怪遠方之客採奇方於儋崖剖明珠於海舶巴姑笑
而嬋媛徭尸聞而踵索忽抽刃以剽殺各鳥散而狼籍
至於遷客羈人幽囚嫠婦銜悲嶺嶠寄愁林藪影畏含
沙之蟲心繫啼猿之樹朝露泣其寥蕭夕月藹其幽素
愚山先生文集 卷一賦 五

然青燐於宿莽弔冤魂之麝聚或風噪而雨嘯涕闌干
以相顧撫單影之不雙嗟遇物之非故邈中土之人兮
夫何爲乎此路忽收淚以自疚兮將憔悴兮告誰尼父
發波臣之歎張騫犯織女之機三閭吞恨於魚腹伍胥
流憤於鴟夷彼聖賢不忤乎死生復何有於險巇龍負
舟而按劍蛟爭璧而不迷審至人之髮拂悟哀樂之是
非齊四海於勺水指十洲以爲期

大樟賦

吉州官舍旁有廢署亭館旣虛古樟獨存榮枯
相半不知歲年顧影婆娑情感斯集爲之賦曰
維豫章之都會兮依茂樹以立名生七日而表異兮更

累禩以長生何喬柯之拂層霄兮寄婆娑於空庭洵魁壘而耆碩兮頎然如故國之老成旭日澹兮晡晡靈飈發兮清泠驚絕巘之秀峙兮紛蒙籠兮崢嶸影扶搖兮千仞腹輪囷兮十抱體臃腫以辭繩墨兮節礪砢兮骨傲卜歲年其莫知兮若根株之天造塊獨處兮旁無人風夜號兮雨嘯豈不可崇棟而丹楹兮聊樛散以相羊爛五色兮繡錯凝清液兮芬香涉蕭滅而不槁兮棲綠葉兮玄霜苟孤榮之不隕雖憔悴兮何傷歟青陽兮載旋敷繁英兮峭蒨枝油油以雲垂葉冉冉兮霧散弛巾帶以命觴蔭炎歊而却扇豈日月之改度愕寒暑之頃變旣連蜷兮善下復夭矯兮若游廻衆羽以來巢兮羣

愚山先生文集

卷一

賦

六

長子孫而鳴啾啾卽梟鸞其雜處兮亶道大而能周木寄生兮成拱芝叢秀兮菌聚寧頽形而瘁貌兮招萬類以疣附悵亭館之就墟兮巋階基其如故彼息影而坐憩者聞焉如四時之代去悟盛衰之相推兮蘊憎怛而誰訢生偃蹇兮正直集百靈兮憑依駕飛龍而降雲中兮森蘭旌兮桂旗聆笙鶴之逸響想羽人之委蛇樂虬蟠以觀化兮秉素節而不移鄙封爵兮秦松遠宮闕兮漢柞齊大椿兮春秋悲楊柳兮搖落卽苑枯其代嬗兮若逍遙於廣莫滄海竭而山摧兮懸鄧林之殫殘良託身兮得所歷斧斤而獨完時開襟而矯首兮閒倚嘯而盤桓終含貞兮抱朴審大道之所安

南郊賦

伊有國之大事維享祀之是崇矧帝王之踐阼曰受命於蒼穹溯感生之所自出知皇降之特隆偉哉父天而母地緬呼嘯以上通固明且之必虔尤嚴格於升中司天肇於顓頊授時命於姚氏有虞舉郊禘之典夏商異繇寘之祀易稱殷薦書紀肆類代相祖述姬旦備制圓丘象乾就陽設位卜日用郊歲維冬至蓋緣父以祭天乃推祖以作配候葭灰之微轉感生氣之初遂告萬物之將成因祈穀於來歲司時之帝有五昊天之神則一事不委諸有司誠必致乎齋粟望柴之牲用特瓦甗之獻凡七雷以靈龜之鼗鼓奏以雲和之琴瑟雲門之舞

愚山先生文集

卷一 賦

七

從風孤竹之管協律所以天神降地祇出會百靈格太一故掃地而祭以明潔也崇土而丘以示尊也紫壇翠幄象九霄也陶匏太羹昭素質也大裘素車無敢飾也齋路寢而聽雞人修祇肅也先十日而戒百官各舉職也於時元冥司令青陽啓塗微雪滌濯夜皎星疎天雞初唱絳節宵趨掌次張帷典路驅車天子乃乘玉輅綴垂旒夾道炳燭司樂導輿飛廉清塵於三輔啓明發躍於九衢揚和鑾以中節象珮玉而鳴琚望郊壇以屏止雲連蜷以脚踏氣鬱葱而布濩髮髯乎神靈之所都集羣公與百辟咸夙夜以瞿瞿森文武之就列洵秩秩而于于乃燔芳薪進牲幣酌五齊薦蒼璧饗上帝而配

始祖相陟降而爲主客日月星辰羅布若次舍風伯雨
師旁分其几席腥熟旣陳芬芳疊積鐘呂互奏磬石戛
擊太常審音宗伯執爵調八音之和奏九成之樂冉冉
乎雲車之下臨臯臯兮霓旌之叅錯就丘壇以醉飽紛
百靈之相索睇帝座之神光如流星之灼爍聽鈞天之
有無流逸響於寥廓鬱紫烟其靈鑿屬黃氣以旁薄旣
畢獻而樂闋猶秉圭而頤若爾乃隱列宿吐朝暾回鑿
鏘鏘屬車啾啾祥雲四塞上連天門登高臺而望南時
燔柴之餘霽猶蜿蜒而氤氲念昊天之久有子實一本之
尊親怪漢武之濶畧乃三歲而間舉明禋苟齋沐之稍
怠或暴風怒雨以返輪故曰通天之義報天之禮非徒

愚山先生文集

卷一 賦

八

肅將於俎豆厥惟令德之馨聞懿我 皇之天縱渺睿
慮以如神旣左經而右史亦講武而修文恭儉惜露臺
之費寬和布泣罪之仁巢有阿閣之鳥囿有九真之麟
躬鬯盥其必與奉烝嘗之孔勤蓋與天而合德將無瑞
而不臻由是祠官夙退史臣受簡拜手稽首而獻頌曰
皇建極服南北薦馨香見天則罷兵革平反側壽萬齡
懽九域重曰謹壇壝集靈祇闔闢開卿雲蜚命惟新天
無私滋黍稷雨暘時於是 天子大悅受釐宣室維惠
廸吉顧視弗諉日慎一日

南苑大閱賦

天胙聖德地盡皇輿爰 玉曆坐撫神區維赫濯於新

命踵幽燕之舊都岱宗位其東藩太行峙其西隅枕居庸而帶滄海象天闕之辰樞亶建極於垂拱豈航逸於康娛然而遊豫徵於夏諺畋漁肇於義易姬文有靈臺之詩漢武侈甘泉之制蓋將以觀雲物節勞逸振師旅講武事藉田禽之多獲簡軍實以有備乃有西苑瀛臺近取禁內樹列千章山稱萬歲俯玉泉之清泠挹西山之紫翠眷別苑於南海伊密邇於玉畿壤連天以曠莽水浴日以漣漪插崇墉於雲漢清輦道於郊圻睇紅門之叢葉想帳殿之參差其陸則塗通九遠軫連三輔金臺扶轂督亢接武碣石遠而來朝翠微近而獻嫺眺平楚之蒼然樂原田之膾膾其水則涵沸沆瀣澹滄淵泓

愚山先生文集

卷一

賦

九

乘乾輪派溟渤效靈島湮渚溢風靜波鳴囊括太液鉞揚昆明閃旌旂於河伯動鱗甲於石鯨邈乎若乘槎之浮銀漢彼哉哂求仙之汎蓬瀛於是菰蒲沉綠菡萏敷紅鴛鶩翡翠仙鶴賓鴻呼羣鼓翼唳雨鳴風屬玉翔而上下赤鯉戲而西東雉兔磨農遊集乎其外虎犀熊兕騰躍於檻中玉樹蒼鬱佳果連卷張公梨茂朱仲李蕃葡萄盧橘珠綴火然上林閒居之賦爾雅方物之編窮侈極異不可殫言時登高而騁目樂四野之芊眠是時百穀告成八荒賓服西旅貢以厥蕤於闕獻其浮玉龍馬來於大宛象師致於西域天子治不忘亂安不忘危乃詔虞人營虎落乘戎輅載白旂千騎電發萬乘風

馳用三驅以祝網命八校以前驅竟陵谷以張單界河
海以爲陸次飛賁育騁其拳勇韓盧雕鸚恣其指揮俄
摧山而抨石捲四野而合圍氣吞麋鹿手搯熊羆皆應
弦而命中若俯身而拾遺風毛雨血括雄併雌由是割
鮮殷輪委禽蔽地程校多寡殿最次第勇怯分明惕威
銜惠鳴銑振旅歸而飲至天子乃推絳灌之宿將詢
巨奭之訐謀尚想頗牧之賢旁覽孫吳之書敷文德於
荒服定勝算於廟謨姬有荆舒之懲商有鬼方之誅晝
策則燭照而數計殲寇則拉朽而摧枯令嚴則過王師
於衽席功成則告列祖以獻俘然後班張枚馬驚聽賊
睹或奏賦於長楊或歌思於湛露頌擬白狼歌傳朱鷺
愚山先生文集 卷一 賦 十

鏤德銘功垂諸竹素天子乃斯無逸戒禽荒佩虞書
九德之盛詠豳風七月之章眎異姓若赤子以八荒爲
蕭牆倚允文而允武亦知柔而知剛將麟遊而鳳至永
萬壽其無彊

修禊賦

懿景運之邁古樂聖世之如春履開陽之令序撰季月
之芳辰矧膚功之壘奏忻天氣之方新豫皇情於夏諺
騁帝狩於虞巡於時勾芒司候姑洗應節淑景和柔英
蕤布列都邑競游士女咸悅綺服塞塗華輶接陌或憩
蘭田或戲霸渚駢席雲移攘袖風舉若夫宦遊仙使戚
里豪家尋芳林麓拾翠水涯灑醪決溜浮棗成霞山鳥

窺筵而哢響游魚蹴浪以吹花 皇帝於是佩蒼玉駕
青輅騎命渥注弓發繁弱解袂柳泉流觴清洛侍衛續
紛旌旂灼爍馭叱山靈懽騰海若爾乃川原獻瑞雲物
開祥黃河穢滌白馬神翔捧劍而金人出水校射而星
鎬穿楊講武則騎從頗牧畫文則投簡班揚聞東哲之
對而賜金稱善諷右軍之序而觴咏難忘斯時也雕雲
映輦靈鸞扇裳移情南澗游目東堂并桃舒纈苑柳拖
黃紫蘭汎景紅藥含芳彩仗徐動翠幕高張乃集羣英
命篇章入瑤圃挹天漿緬河曲之盛集陋溱洧之微蒞
笑三女之怪誕指八公以徜徉美宸游於元已擬獻賦
於林光旣蠲煩而集祉亦俗阜而時康遊豫喧闐於九
愚山先生文集 卷一 賦
陌聲靈遙被於八荒

吃賦

元晏先生咀茹百家尚友曩詰窮論殫思倦而假寐若
有見焉董仲舒賈誼劉向馬遷楊雄司馬相如班固張
衡不謀斯集坐定田駢慎到之徒披帷直入不埃咨度
發難騁辨談天炙轂飈馳雲起元晏先生耳不用聆口
不給應於是董賈諸賢談言解紛班張接袂寓辭託諷
相如楊雄矯首卷舌褒如塞聽元晏先生听然曰諸君
子皆不世出之英文辨之士也兩先生獨墨墨豈不足
君所耶竊聞兩先生口吃沈默好著書多博麗之辭盍
請爲吃賦馬楊避席固辭交讓楊舉手屬馬曰公雄之

先進也夫何辭相如始受簡含毫有項而賦曰物無鬱
而不宣人無噤而不言伊辨訥之殊分亶天授之自然
或發聲若洪鐘或大笑如蒼蠅或舉舌如懸河或出口
如不勝乃有非啗非啞藥石罔治產非鳩舌言近侏儻
掀唇頓頰疊韻重詞語未吐而顏頰聲欲急而逾遲駭
中斷而不續且語竟而終疑誦詩則宮徵失諧論事則
賓從匿笑詎三緘之是規將鬱伊而莫告已而賓退體
閒散帶開襟圖書在列清颺在林抽我秘冊操我素琴
沉吟朗詠山高水深牙期頰耳夔曠停音爾乃包羅天
地採擷萬彙作爲詞賦筆雕楮繪氣凌雲而若飛才換
天而不匱言懽而雪谷華敷叙悲而春林霜悴託諷諫
愚山先生文集 卷一 賦 三

於君王時比物以連類不俟淳於之滑稽何假東方之
遊戲且魯恭苦吃位列漢藩李廣訥口戰稱飛將韓非
說難以悟秦周昌強諫於騎項此皆流聲史冊者也夫
何嗛嗛以吃快快楊子雲曰美哉其猶未旣也子不見
夫枋榆斥鷃肆飲啄以從容黃鸝百舌獨坐閉乎樊籠
信如簧之階厲哀尚口之必窮懲邦家之傾覆唯佞倖
之是庸吾固知百鳥之嘖嘖不如孤鳳之嚙嚙且夫風
假物以成籟天垂象而無聲雷出蟄而偶震水潭靜而
灘鳴所積者深厚所發者難名試因蹇而緩言善藏其
短苟難辨而守嘿用寡厥尤艱寒暄於猝遇或工入座
之應酬濫言辭於客座或詳奏對以如流多言生垢維

口啓羞行將謝辯士討遺編馳情象表逸思物先揮斤
堅白艸吾太玄千言波委儀秦結氣單辭抉奧義孔比
肩俾言立而行遠冀書成以有待鏘金石以寫心曾嘯
歌之不廢嗟韓周之二美猶逡巡於吾輩彼竊笑而旁
譏埒蟲聲與鳥喙愍羣生之何辜橫就烹於游說又何
羨乎嗇夫之喋喋便給哉廣川子曰兩先生之言盛矣
而未免乎夸也夫吐辭成經多寡咸宜吉人罕踈語默
以時吃固非病夸亦奚施乃歌曰讒夫張兮貝錦怨箴
捫舌兮白圭善天與默兮守吾中寧自安夫拙謇時坐
客皆太息而罷元晏先生瞿然寤喟然歎曰偉哉江都
言約而富起而削牘書爲吃賦

愚山先生文集

卷一

賦

三

洗象賦

蓋聞帝德率舞乎鳥獸王風不廢乎觀游匪騁眩目之
樂亶敷咸若之休故麋鹿集乎靈囿虎兕入乎上林重
譯絕阻之塞飛走珍奇之屬莫不梯山航海貢瑞獻琛
皆兼收而並畜使遊高而泳深于是林邑交阻慕義內
嚮匪熊匪羆厥貢馴象其爲物也素牙挺柱修鼻垂環
蒼質擬石厚重等山鼻叩地而鼓簧以奏身服教而拜
跪知嫺芻粟潔清頌廩給以有秩居處爽塏列大屋以
重關乃司魏闕乃服大輅朝謁謹時步止合度受詔則
割膚不辭蓄勇而在羣罕鬪固惠養之積年亦馴性之
有素爾乃令屬祝融節苦炎熇馬解鞍而喘汗人揮扇

而煩囂念茲體之麗重非霑汗於一朝聞渡河而徹底
盍試浴以洪濤乃諏吉日弛羈勒出重闈就巨浸鼓吹
旁喧官騎前引其往不疑笑野狐之涉水其行坦步鄙
渴驥之奔泉初憑淺渚或踐澄淵昂首則神蛟鼓浪捲
鼻則長鯨吸川旋蹙盤渦則倒瀾曲注仰沫噴流則飛
雲散霧嗇夫奮帚拂拭容與苟毫末之可浣終不匿乎
泥污於是驚矚駭觀溢郭塞路公卿結轡以來游至
尊回輦而一顧何一物之遭逢濫九重之榮遇若夫羲
車將昃去川卽涂旣捐宿賦彌耀鮮膚霑疑汗血流賸
垂珠被清泠之適體若顧戀於須臾儻洗沐之可數將
何畏乎江湖夫韓盧至健供逐獵以追風虎豹至猛長
愚山先生文集 卷一 賦 七

日兮來郊原
牡丹賦

瀛臺之西太液之涘天作一丘鸞停龍起玉泉遶流燕
山側峙宸遊禁苑實據其趾山呼萬歲園稱百菓珍
禽翼接異卉花妥潘岳閒居不能列其名相如上林未
遑載其顛羅羣芳於四時推國花之獨冠旣叢植於芝

房復駢延於蘭館信奇葩之可懷萃根株之無算若夫
梅英纔落柳絮將黃東風游煖疊蓋初開盈盈灼灼鬱
鬱皚皚千枝萬朶拂檻翻階雲殷別苑霞綯高臺白擬
玉版赤類丹砂旣眞珠之九葢亦千葉之蓮華壽安潛
溪以地異添色倒暈以種誇品盡洛陽之美數過廬陵
之譜勝玉樹之菁慈豈人間之所睹 天子乃佩蒼玉
幸離宮移步輦就芳叢翠華旖旎周覽肅雍或紺蕊扶
疎獨號朝天之紫或露苞灼爍名擅御袍之紅或臨風
昂首晨露未晞若向榮而吐氣聳翔步於金闕或回颺
側景朝雨方滋若承恩而旣醉還霑灑於朝衣列樹爭
妍若六宮之奉顏色異彩繽紛又若冠裳之來萬國爾
愚山先生文集 卷一 賦

兮不可得舒大文於東皇兮攬春暉兮何極

菊賦

倚山澤之靈卉稟天地之清剛森抱潔以標素亶含貞而爲章葉沃若以散霧枝翹翹其待霜愍百艸之搖落歲崢嶸而獨芳雖狼藉於權籬將憔悴而何傷豈東華之不我告厲晚節以慨慷匪背暄以昧時固淑性之有常紛雜彩以陸離受金精而黃裳乘少皞之司令秉正色於中央遂回秋以成春詎姚氏之可王爾乃清飈疊薦白露旋實燕翔北翼鴻賓南景川原澄肅風日凄緊嶺桂告徂湘蘭泣冷肆騁寒葩載吐萼頰霑瀼瀼其若飴飄颻颻以逾挺或敷浚谷或昌澄潭灌根天池滋族

愚山先生文集

卷一

賦

七

崑嵐侶朝霞兮照曜與雲木兮相參喟芙蓉之凋歇悲楓樹於江南若乃辭宿莽登廣廈蔭山房凌水榭太故土而從遷迎沍寒而不謝蛺蝶莫由睨其旁螻蟻不敢侵其下於是詞匠勞人曠懷高寄落英晨餐延目心醉收囊用枕紉華充佩肇獨賞於靈均張五美於鍾會亦有逸客勝流采芳滿手昌零雨以幽尋坐東籬而汎酒見南山之悠然忻歲月之無負或命之幽人或招爲端友或升於丹陛或植於靈囿當上林之滌若揚麗綺於獨後歡旣醉而作歌眷相遣以介壽謂凋齡之可扶藉紫莖而黃耆懿魏文之賜書尚芬傳於人口爾其應重九之令候乃抱一以便娟伴絳囊之高會簪歌帽於風

簷刀圭收以祛疾甘谷飲而長年宋孺子因之羽化周
少夫吞之飛仙侈前賢之賦頌疊稗官之軼編茱萸黯
其減色秋蘭亞其比肩洵有美而必彰非爭妍而取憐
藐拒霜如吹籜又奚問夫落葉與哀蟬悟萬脆之必遭
羌獨守夫貞堅同後彫於松栢聊嘯傲兮忘言

施愚山先生學餘文集卷之一終

愚山先生文集

卷一

賦

七

施愚山先生學餘文集卷之二

志譜序

袁州府志序

傳曰沃土之民淫瘠土之民思思則善心生於是知瘠土之易爲理也江西郡十三袁稱瘠焉川谷僻窳巖石廉利其巉峻磊砢之氣小人得之爲愿樸君子得之爲介特其發爲文辭則又多高寒幽峭之音鄭守愚之遺風猶有存者近代黃太常抗節犯難精誠動天地其後士大夫多厲廉恥尚節烈至今未墜民間閭巷無紈綺皆安儉守簡淡然而易足固知瘠土之民多善也然畊作弗力徒手召佃山谷麻枲之利讓之閩越之流民而愚山先生文集

卷二序

一

土人不有予又嘗惜其儉而未勤也使之力穡重農棄師巫而崇禮義庶幾稱治而非上有休息之政無以安瘠壤之民蓋地逼長沙逋民客戶易亂難靜考諸往牒江楚有事袁必先受兵故明初設重衛以鎮之籍軍視他衛獨倍懲已事也賦重糧浮積累幾三百年賴今

天子一旦減除德意洋溢一二賢長吏又與之釋負息肩民稍安集吾冀後之人其毋或擾吾民也夫大屬之愛莫甚父子有寗人焉不克衣食厥子曰撻而索其養鮮不離矣況吏民乎吏實牧民若之何弗思也夫鑑水知貌鑑古知政郡故有志殘缺漶漫順治丙申前守吳泰巖補刻新志一冊文采斐然忠其析未合軼未全也

告郡大夫李煥章率其邑長摻集屬友人博洽者合校
爲是編於乎志亦史也利病必詳好惡毋作浮華弗摭
亦猶良史之遺也初浮糧告蠲之役事下部議患無所
依據賴前守持郡志白部事遂定於乎後之吏茲土者
綜古核今其必曰某事便民某事厲吾民其尚知所從
事哉書凡若干卷始自康熙甲辰迄丁未秋乃成

重脩臨江府志序

施子有述職之役臨江府志屬草甫定請爲序予謝曰
志蓋非子作也夫爲政在力行不貴多言苟得樹尺寸
澤被一方卽椎鈍少文何病焉惡在其以文章飾吏治
也然史乘圖志之書所以紀事而載道也故文獻不可

愚山先生文集

卷二序

二

以無徵也順治辛丑秋予分守湖西徵臨江府志自隆
慶以來闕焉時歲饑民勞與郡邑諸大夫合志休息數
年民稍寧處旣新學舍繕城郭百廢粗理始議修郡志
請於巡撫中丞董公報可會予驅車入賀道病輒心掉
簿領之外不暇治他書然竊謂今國家肇興混一車書
天下郡國志所在修輯臨江故文獻地自宋劉孔諸君
子以還名臣碩儒相望簡牒比者闕載籍將百年其吏
於茲生於斯者豈翳乏人而父老不能舉其名碑碣不
足詳其績上之良法美政下及貞士節媛寢就湮滅不
可勝數是用滋懼夫廢前人之盛美遏潛德之幽光略
因革損益之制度無所徵述皆後起者之責也用是咨

於郡大夫王君通告邑長及薦紳博士弟子網羅縮次
歲餘始草具其事又屬友人高子阮懷爲任筆削先是
隆慶志成於太守管君大勳從事者則郡人比部劉君
松也其筆簡嚴多軼漏茲因其義例而摭摭加詳文詞
略備遠無徵及見在者概不立傳以闕疑遠嫌也至於
賦役綜覈則專屬之清江令屈君余病未周覽聊藉手
告成事焉志蓋非子作也古者三年報政取民間風俗
以觀政治得失予監司茲土六年矣月吉讀法申命再
四間與賢士大夫講學考業以磨切俊良雖勞不敢輟
而風俗之移易何如哉頃歲復水旱寒燠違時民惴惴
供億不給予又以奉裁去拊其疾苦予以煦育是專賴
愚山先生文集

卷二序

三

乎司牧之君子書之以志吾憾也康熙丁未仲秋月朔
日記

新秦志序

太史公自敘及列傳推論古作者並稱窮愁著書垂文
以自表見然則著書者顛顛不得志者之所爲也苟有
吏事之責簿書之煩則其勢有所難兼夫爲吏之難至
今日極矣錢穀訟獄盜賊逋逃軍典期會之役一人之
身而考成之目以數十計缺一焉皆足以曠官而論罷
於是疲精耗神思慮煩其中耳目亂其外以庶幾奉職
救過至於史乘文獻之林非獨不能作也寓目劉覽者
亦十不得一焉楊令君之爲新秦也若行所無事而百

務具舉士民安之已而詢父老討掌故俯視濮水思師
曠之賞音仰眺宮山弔漢武之遺跡見山高而水長慨
然思高堂生羊叔子竹溪六逸之流風餘韻庶幾遇之
而邑乘缺有間矣乃謂前事者後事之師也其曷可不
志徵文考獻與邑教諭舉人牟迺廣摭約取舊分十卷
者定爲六卷凡星埜山川城郭土田人物食貨災祥藝
文之類燎若指掌雖古之窮愁著書者其精析無以加
焉先楊君而令者爲今東郡太守盧君好古修廢不遺
餘力其事犂然見於篇而楊君博雅能詩宜其才長力
裕考鏡於古今得失之林也若楊君者可謂知所從事
矣

愚山先生文集

卷二序

四

廬陵縣志序

急吏事則專簿領懷古學則詢簡牒二者嘗相妨而不
相併而賢者兼之裕如收文獻於放軼之後讀詩書於
案牘之餘人謂不急我獨卒圖將以鑒往跡昭來訓胥
於是乎有取也廬陵於古爲郡於今爲吉州巖邑蓋歐
陽公文信國兩先生之鄉而河南兩程夫子數過其地
明又宰之以王文成風澤政教涵漬漸摩蔚爲大賢雲
集霧合予視事之暇講學青原白鷺間得三祀舊志求
所謂卓然三不朽者考定姓氏嚴恪俎豆未嘗不踈踊
嚮歎尚友其爲人問之郡縣則志乘不備殘於古而闕
於今者多矣吉故連虔南交閩粵處戰爭之地數罹兵

禍廬舍煨燼荒城殘市或求尺籍不可得極盛而衰蓋至此也近者巡按侍御許公嘗有郡志之役矣其時侍御將去太守李君分曹掇輯期竣旬月未免駁漏而廬陵故無縣志也于君慧男來受事則以爲請予蓋心難之其人物多則難區分其事跡多則難綜覈其文辭多則難網羅耆舊零瘁是非參錯則難論定費重帙繁則難劔刷與較讎往見萬曆間吉安舊志爲王公承槐劉公元卿兩先生所修其人理學夙儒義例不苟則以復于君盍踵其例而增益分郡爲縣用力差易會予奉裁去官旣歲餘而廬陵志成屬序蓋擇其邑之賢有文者宋子蕭子輩爲之編輯而于君綜其成發潛拾遺彙爲愚山先生文集

卷二序

五

大冊可謂勤矣于君之會甫司直先生閱覽好古嘗刻金石錄帝京景物略傳之四遠而慧男世其家學喜爲故舊表章遺書其在縣修學宮葺書院請蠲粵鹽之累吉者民用稍蘇蓋其畱意於文章政事非獨一縣志也予嘉其不辭難也因其請而并及之

安福縣志序

縣志蓋一國之書其昉史差易者三而其陋有五夫書約則易殫地狹則易稽人近則易辨然史之爲書掌之太史修之異代善惡錯陳褒譏互見書成旣奏流播方寓天子不遑匿其過舉子孫不能諱其祖父其中雖間有得失猶爲近核若夫郡邑志乘官非左董義爽筆削

頌長吏則諛傳先達則誇紀名勝則傳會撫文詞則浮
蕪分星野攷沿革則淆混書取速成事多踳駁甚且論
符衆口一人矯喙板藏邑庫改竄潛加官吏不能校其
非士大夫不盡觀其籍遷延日久遂成掌故余嘗極論
志書謂不如國史足信者蓋以此也自非有道而能文
周咨獨斷平心折衷其是非鮮不謬于聖賢然可藏之
於家未可以示國人何者愛憎蠶起而牽制之患多也
則擇人善任不得不歸賢有司安福縣舊無志有之自
今中州焦令君始然其書固非一時艸創無所按據者
也明武宗朝布衣張子松以理學著有安成叢錄鄒文
莊嘗爲之序神宗時劉徵君元卿又著福乘藏稿二君
愚山先生文集卷二序

六

所謂有道而能文是非不謬者也藏之既久人無異詞
今踵而增之遂成縣志又有邑薦紳王謹山司諭鄧五
峙明經朱昭遠及文學諸子各任蒐討義無浮濫予以
著安成山川風物之美張巨公名卿理學貞孝士女之
盛使後之聞者希風景軌於斯爲烈一國之志而不悖
史之義者其庶幾乎予不及寓目卒業而焦君屬序再
四夫安福昔處物力充牣文獻輻輳之時邑令闕然無
成書今乃成之於難爲之日夫豈碌碌簿領之吏所可
望歟

廬山志序

志山水者類稱山記而約有二端揆覽巖壑形勝及人

物往蹟是紀事也。討據簡冊，摹索崖碑，以廣舊聞，是徵文也。事易湮漏，文易踴增，好事者畧古而崇今，徇勢以取悅，拮據雖富，君子難言之。廬山見禹貢曰敷淺原，上有禹書六字，是爲廬山文字之祖。太史公南遊登之，無所紀述。晉始有惠遠作詩，迄唐太白諸公而盛然。淵明近在柴桑，醉臥行遊詩中，無廬山一字，以今跡之，古人爲儉於才矣。西昌前輩蕭伯玉常病近志蕪穢，獨喜桑子木廬山紀事，謂遺文散失，如周景式、張僧鑿、陳舜俞、馬玙諸記，戴師愈、廬山文物列傳、孫季藩、廬阜紀遊等書，皆恨不得見。而所言桑氏紀事，余購之，亦不可得聞。泊星渚畧尋瀑布三疊，五老之勝，嘆望久之，會吾友李

愚山先生文集

卷二序

七

子鏡月與其友閔子賓連至南浦，將從事。匡廬予告以所憾曰：蓋爲山志，夫志有三難：於山窮遊覽於文，稽往牒於人絕徇濫三者得而志可立就也。李子去三年而書成，蓋本之桑氏廬山紀事，桑以侍御直言謫江州，輯爲此書，觀其自叙亦以不見諸書，未窮遊覽爲闕事。夫酈道元注水經，雖與其書相發，而其注可孤行。今李子以桑書爲本，而窮探博覽，目涉羣籍，又出入往還於崩雲墜石之間，凡僮廬巖窟斷文賸語，逸擇其可存者，手摹目記，可謂勤且難矣。使後有讀其書者，入此山，歷歷如見所舊游，而學使吳公嘗以拔士之餘，徘徊白鹿洞，嘆息懷古，又亟賞此志而刻之，皆可書也。桑侍御廣陵

人今李子亦廣陵之興化人云

高山志序

平生五嶽之遊蓋得嵩山而有其二焉始跡學齊魯登
泰岱嘗爲岱志再易其藁書成而秩滿不及刻以去今
遊嵩山登封長榮君慕廬方脩輯嵩志屬爲序夫嵩山
以峰名者太室二十有四少室三十有六今可得而指
數者纔數峰耳漢唐宋封禪轍跡相尋壇時宮觀窮極
土木銘金鑿石以垂示無窮今漠然爲榛壤無復瓦礫
磨碑殘碣百無二三登封故山縣風尚質簡士大夫不
好遊樵牧之人無所記述向微舊志則所謂某某峰者
其名亦已亾矣故竹素之壽不及金石萬一迨被兵火

愚山先生文集

卷二序

八

改陵谷在存金石銷隕竹素猶存則是志不可闕也夫
山志有三難前人碑篆多埋土蘚虎穴間吏士足跡所
不至又斷剝多闕文摹錄者以意傳會或棄取失重輕
又不載撰文年月率難核攷其詩文濫登近作動苦蕪
陋余序廬山志論之詳矣昔傅君元鼎令登封作嵩書
十三篇近者鄉先生焦君汝將有嵩高志摺拾旣富葉
君又出私錢命工窮搜石記徧搨以備甄采余杖屐所
到君輒問何碑善數舉以對所賞畧同因相眎而笑君
以名進士理延平有名績改尹是邑與民息肩無餘事
日把卷望二室長嘯其舊著詩文皆行於世知所輯必
良書故不待其志成而預爲序之雖然願君亟成之母

畱子向者岱志之憾也

青原山志序

山經海志合九州內外爲一書其言不煩今窮山浚谷爲佛老精舍之稍著者尺寸而志之游人詞客之言皆在焉聞取視之不能終卷以其罕所采擇無與於大道也青原之爲山起平壤回岡相抱扇鑰層深自七祖卓錫迄於今稱祖庭與曹溪埒前十餘年笑峰禪師始創爲山志屬草未竟其徒因而增輯然唐以前名人罕至者顏魯公黃山谷胡忠簡諸賢始有題咏其餘紀載頗放逸自明至今作者遂多余嘗芟其十一病未卒業會藥公來至是山故以歸之公出其餘力揆括巖穴網羅愚山先生文集卷二序九

舊聞以紀形勝則周傳古德則核列詩記文辭則詳以雅而又以此地爲先儒講學之所祠館雖荒俎豆故在爲萃其語畧并錄之合爲青原山志其先後編校相助有成者則陳伯璣宋商玉郭入回諸子之力與焉或猶以書籍散亾蒐討未備余謂存其大者則小者可畧也夫君子之樂山水非徒以資遊覽也藥公之志是也寧惟誇詡山靈已哉一卷之石烏知其非泰山一勺之水烏知其非滄海其能悠然曠然有得於山水之外者有乎哉若猶未也是所謂自崖而返者也

閩阜山志序

官臨江數年蓋日與閩阜山相望也旣繫于官求登矚

之暇不可得則求其山川艸木之志一觀之以釋吾懷庶幾乎臥而游焉於是得閣阜山注二卷東吳俞策所集也漫漶譌漏至不可通曉以南州陳子公霖家多藏書屬爲校讎而予稍括定更名閣阜山志叙曰古者有道而無仙歐陽子之言也其說甚正莊列之徒始言乘雲上仙事而葛稚川作列仙傳得九十二人豈所謂無其事詭其名者邪王方平降蔡經家多著神異比舍有陳氏者欲從執役學仙方平立而視之謂其心邪不正未可教以仙道抱朴子曰求仙以忠孝和順仁信爲本若德不修而但務方術終不得長生也然則神仙之事與聖賢之學蓋亦有相近者後世方技家乃徒侈言黃

愚山先生文集

卷二序

十

白以求大藥不亦愚乎臨江東有閣阜西有玉笥皆道書所稱名山爲靈異所棲而閣阜尤盛相傳葛仙翁學道冲舉處宋時宮觀道院至千餘間朱考亭周平園嘗來游賦詩今荒榛茂艸丹井故在卽而求之其亦有餐霞馭風之人潛游其中而不見知於世者邪

蕭縣顧孫氏族譜序

氏族所從來久古神明之胄聖哲蔚生其後或氏以官以國地遷代遠寢失厥初攷載籍所傳仁人賢士不數葉而微絕者不勝紀鄒魯之間故聖賢之都會也子嘗視學東魯求其子孫孔顏而外曾孟僅十數人他無在諸生籍中史記弟子列傳七十二子之徒不見書傳者

四十有二人其苗裔之盛衰有無與散在他國皆不可知也嗟乎以彼文學性成又得孔子爲之師稱高弟子而卒不詳其言行不辨其氏族子孫蓋保世滋大若是之難也間過徐泗之交其子姓蕃者莫如仲氏蓋子路之後也其次則蕭縣閔氏顓孫氏史稱顓孫氏子張陳人也而其墓在蕭縣今蕭人顓孫君佐聖爲峽江令問其祖則先賢子張且謂子張年十四從尼父往來鄒魯家於蕭子國卽今蕭縣也墓在堀坊村唐宋累封陳國公嘗置博士世官今專祠尚存子孫守之六十四世矣所藏象志遺書佐願以視事之餘補輯殘燬丐公叙之子謂先賢之名德倣於孔氏知日月在天不可掩滅且愚山先生文集卷二序

十一

不以子孫重于譜牒何有焉然慎守先籍亦所以昭繼述也檀弓不云乎美功不伐貴位不喜不侮不佚不做無告是顓孫氏之行也然子張之問孔子見於魯論者數矣其意多喜聞達尚高遠孔子悉告以反躬篤實之學蓋不難在聞達以無尤悔爲難也子旣才而祿矣施之盤錯無不當意其尚勗爾宗人懋爾嘉言懿行以光厥先緒謹受簡以書俾藏之世世

水陽河西李氏族譜序

邑水陽李氏族譜成李君元愷茂之載其書以示施子蓋取元至正明嘉靖舊本釐定之從事斯役者茂之偕其兄元叔及元白輩皆賢有勞任而屬張徵君芑山爲

筆削君子陳書而攷其義蓋重有取焉夫譜以明系重
吾親所自出也親所自出雖微必溯非親所自出雖貴
不援狄武襄不附梁公後識者憚之李氏舊譜引盤谷
李愿爲西平郡王晟公子今辨其非是斷自龍溪公始
則本系以近而明親親之至也龍溪公肇居河以西抱
德終隱厥用弗彰爲傳其生平及昆弟後裔之賢者並
采軼事羅舊聞用以發抒潛德俾後人有所嘆興尚賢
之義也它若詳世牒述家訓嚴繼立之條講惇睦之道
其起例也簡而該其褒賢抑不肖也微而顯其爲大小
傳記也質而不蕪是可譜矣今世士大夫喜稱大家謂
其世遠族蕃且貴也余聞之先人曰世家易大家難俗
愚山先生文集

卷二序

十一

所謂世家者或位公卿世累纓笏相繼然而公卿貴人
咄嗟立盡高門巍閣吾見其生荆棘穴狐兔也甚且墮
其家聲爲先人僇族雖大無取焉若夫戶詩書而家禮
讓崇本尚實孝弟力田族不必皆賢而嚮善者衆有弗
類者恥之讓之其賢者慕而頌且效之貴至將相而不
驕困爲匹夫而不諂保世亢宗以無失墜是之謂大家
非僅僅富貴者比故稱難也是言也先皇考嘗舉以告
族人閭章爲兒時心識之近見廬陵王塘南先生序其
家乘亦述先儒之言曰子孫才族將大夫族之大繫于
子孫之才譬猶榱桷杞梓之材雖在拱把已卜其于雲
蔽日矣否則枳棘塞塗凶足算也蓋族蕃則善人常少

而不肖者多不肖者多則善人寡黨而教有不行吾虞
夫族大之難言也今李氏昌自龍溪公世有隱德上之
稱詩而述禮次之敦本以息業其父兄子弟多引繩墨
厲廉恥又有耆碩如茂之不言而躬行李氏之相成以
善者日有進也族之大將於是乎在茂之色動起謝曰
是不獨揚先德也其可志簡冊以啓我後人遂請書爲
序

螺川章氏譜序

往予聞萬曆中九龍陳先生倡學宛陵從者輒數百人
是時螺川章氏德操伯輔仲輔諸君子皆從其游而先
大父中明公與仲輔尤善往來講學章氏聚族瞻聽蒸
愚山先生文集 卷二 序

三

蒸然多善類一時宛陵推螺川有鄒魯風予稽其先世
相傳出姜姓國于鄣以國爲氏其源殆不可考而開國
忠憲公仔鈞大顯於唐族甲閩浦城其後文通公令吾
宣遂家於宣之北郭在宋貴顯多名人著聲實天子數
降救褒美而徙居螺川則自國華公始以螺川負山帶
河故耕漁地可永久也今歷四百餘祀族益蕃滋衣冠
之冑相望蓋章氏之明德遠矣史稱忠憲公用兵時有
二將得罪當歿夫人練氏俾亡去後二將還攻建州將
屠城授夫人旂免其家夫人報曰君幸念舊德乞全此
城卽不聽請先衆歿義不忍獨生二將感泣城獲全其
後忠憲公十五子顯者八人皆夫人出夫脫二將於垂

歿之地而卒不惜一家之歿全建州一城之衆忠憲夫
人之德厚矣其世居浦城者無論予過會稽道墟章氏
稱撫仕者接跡問其祖則忠憲他如雪溪及吾邑崑山
寒亭草湖所在多章姓亦無不祖忠憲者豈其支裔散
處使然與土之沃者生必蕃源之深者流必長章氏之
明德遠矣宐其子孫殷庶貴盛蔓衍至不可殫極矣今
螺川自明以來雖不多顯者而詩書理學之風繩繩不
替蓋無媿其先世者吾友章子聖修行誼篤謹仲輔先
生子也以予習其家世能不忘言故出其譜牒使予序
而藏之

斗山楊氏族譜序

愚由先生文集

卷二序

四

余嘗作老癡楊先生傳其畧蓋得之楊君仲建仲建家
黃池舟上下必道其廬至則相索久游而不厭聞其五
世祖曰宗信嘗以千金置橋橫崗鄉人傳稱之而其伯
父儒父伋皆嘗與先大父同問學于陳九龍先生之門
以是余兩家交最舊因得盡徵其先世楊氏之先蓋家
陝有自陝而廬州者世爲合肥人宋靖康間高宗南渡
避亂於宣城之北境遂家於宣可紀者自曾六翁始其
子遷斗山又遷花橋數傳而有宗仁宗義宗禮宗智宗
信凡五人用儒學敦孝友五人者有子十二人其能詩
而著者曰實曰貞實號竹屋其詩不多示人貞則與莊
臬定山左輔廷弼諸公游好詩傳於世所稱老癡先生

者也。自老癡以上同居六世。至是而蕃始析產。以其始盛于五人也。至今謂之五房。而傳其孝友不墜。積學有稱者。多以明經薦。晉寧知州緒廣平通判綸。皆廉惠以名其官。賢而厄于卑位者。曰謙。曰迪。以教爲職。能置學田育貧士。其以孝特著者。曰級。居母憂廬墓三年。爲時嗟咏。至於婦女節烈。或殉夫而歿。或無子而守。或未字而貞。殆不勝數。施子曰。善乎楊氏之教其家也。仕宦稍疎。而文學俊良。子孫相屬。蓋上世氏族稱才子若干人。不惟其官。故賢者用顯。晉唐以來。競重富貴。侈閱閥。非顯而在位。及與名公卿游。則雖有碩德茂才。往往湮沒。此布衣隱君子之所爲罕聞也。行能克修於家。聲譽或

愚山先生文集

卷二序

五

不出諸閭。可不惜哉。然關西楊氏四世三公。清德名當世。極盛矣。禍患相尋。間多不免。故或公卿而傾。殆或被褐抱書。而保世永存。君子亦爲其可繼者耳矣。楊故有舊譜。以老癡攜至金陵。適罹火厄。今自曾六翁始。者志慎。志信也。仲建屢述其先德。余嘉其意。可爲勸。故叙之詳焉。



